



Broj: 02-04-1001/21  
Datum, 04.10.2021. godine

## ZAPISNIK sa 9. redovne sjednice 7. saziva Općinskog vijeća Doboj Istok

Deveta redovna sjednica 7. saziva Općinskog vijeća održana je dana 30.09.2021. godine u zgradi općine Doboj Istok u Klokotnici sa početkom u 10,00 sati.

PRISUTNI: 17 vijećnika, Kemal Bratić, općinski načelnik, Omer Hadžić, sekretar općine, te predstavnik RTV TK.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „ Uvaženi načelniče, kolege i kolegice vijećnici, predstavnici medija esalamu aleikum i dobar dan. Otvaram 9. redovnu sjednicu 7. saziva Općinskog vijeća Doboj Istok. Molim tehničkog sekretara da utvrdi broj prisutnih na današnjoj sjednici. Prisutni su svi vijećnici.“

### USVAJANJE ZAPISNIKA SA PRETHODNE SJEDNICE OPĆINSKOG VIJEĆA

Selmin Karić, predsjedavajući Općinskog vijeća: „ Dobili ste zapisnik sa prethodne sjednice i ako ima neko primjedbu? Nema. Ko je za? “

Glasanje: ZA – 16, PROTIV – 0, UZDRŽANIH – 0 (Emira Karić je trenutno odsutna)  
Zapisnik je dobio potrebnu većinu.“

### VIJEĆNIČKA PITANJA I INICIJATIVE

Selmin Karić, predsjedavajući Općinskog vijeća: „ Ako ima neko pripremljeno vijećničko pitanje ili inicijativu, izvolite. “

Izet Hodžić, zamjenik predsjedavajućeg Općinskog vijeća: „Poštovani prisutni, evo nakon duže pauze sastali smo se tu i ja koristim priliku da vas poselamim i pozdravim i da zaželim uspješan rad današnje sjednice Općinskog vijeća i nadam se da ćemo donositi odluke na današnjoj sjednici koje su u interesu građana opštine Doboj Istok. Ja koristim priliku, jer nije vijećnička inicijativa i nije vijećničko pitanje, pošto na dnevnom redu nemamo predviđenu tačku, pa se nadam da mi nećete zamjeriti, da odam priznanje zahvalnosti i čestitke menadžmentu, odnosno direktoru sa saradnicima JZU Dom zdravlja, svim uposlenicima medicinske i nemedicinske struke na izuzetnom doprinosu vezano za vakcinaciju našeg stanovništva, odnosno naših osiguranika. Kao što znate po izvještaju Ministarstva finansija naša opština je po svim izvještajima, ono što mi možemo vidjeti, daleko iznad svih opština na nivou Kantona, a ubijeden sam da smo vjerovatno među prvim u Federaciji ako ne i prvi. Znači, ljudi iz JZU Dom zdravlja su nam pokazali kako se treba boriti za interes naših građana u ovom slučaju za zdravlje i još jedanput u svoje lično ime i u ime kluba vijećnika Narod i pravda iskrene čestitke i zahvalnost i priznanje na svim ovim aktivnostima koje su uradili da to tako bude. Ja sam ubijeden da će i nastaviti sa ovim aktivnostima. Za one, a čisto sumnjam da ima neko ko ne zna, da je u opštini Doboj Istok prvu dozu vaccine primilo iznad 50 % građana, a druga doza je 20 i

*nešto i to je stvarno veoma dobar podatak. Iskreno osjećao sam potrebu da kada je nešto pozitivno na području naše opštine da se to i javno istakne.“*

*Selmin Karić, predsjedavajući Općinskog vijeća: „Zahvaljujem se Izete. I ja se pridružujem iskreno čestitkama upućenim uposlenicima JZU Dom zdravlja Doboj Istok koji su od samog početka pandemije napravili jedan sistem koji izuzetno dobro funkcioniše, a posebno sada kada su u pitanju ove vakcinacije. Koliko ja imam informacija da smo procentualno općina u Bosni i Hercegovini sa najviše cijepljenih, odnosno vakcinisanih građana. Još jednom se zahvaljujem. Ima li još neko?“*

*Refik Šuvalić, vijećnik SDA: „Predsjedavajući, gospodine načelnice, uvažene kolege i kolegice vijećnici sve vas srdačno selamim. Obzirom da je ovaj rezultat dobar, pa kao što sam zamolio kada je bilo u pitanju vodosnabdijevanje da i ovo nastavimo da bude još bolje našim ličnim primjerom. Ja isto ime radnika „Čista“ koji su većinom primili i jednu i drugu vakcinu i hvala Bogu nisu imali nikakvih problema, zahvaljujem se menadžmentu i ujedno molim sve nas, sve društveno političke radnike i sve ljude koji mogu uticati od džemata i naših imama da pozovemo i one građane koji se dvoume da ovaj rezultat bude još bolji i da dostignemo ono planirano da se otprilike 60 – 80 % građana vakciniše. Znači da svi zajedno apelujemo da ovo stanje bude još bolje.“*

*Kemal Skopljak, vijećnik BPS Sefer Halilović: „Prije svega želim da poselamim i pozdravim sve prisutne i želio bih da u ime jedinstvene organizacije boraca Unije veterana Tuzlanskog kantona i u svoje lično ime povodom obilježavanja 29. godišnjice formiranja II korpusa Armije Republike Bosne i Hercegovine čestitam svim učesnicima koji su se borili pod zastavom II korpusa njihov jubilej.“*

*Selmin Karić, predsjedavajući Općinskog vijeća: „Zahvaljujem se kolegi Kemalu i mi svi se pridružujemo čestitkama za 29. godišnjicu formiranja II korpusa Armije Republike Bosne i Hercegovine. Ima li još neko? Nema.“*

### **USVAJANJE DNEVNOG REDA**

*Selmin Karić, predsjedavajući Općinskog vijeća: „Dobili smo prijedlog za proširenje dnevnog reda koji glasi:*

- *U skladu sa članom 56. Poslovnika o radu Općinskog vijeća Doboj Istok predlažem da se u dnevni red Općinskog vijeća stave sljedeće tačke:*
  1. *Razmatranje Odluke o imenovanju privremenog općinskog pravobranioca u Zajedničkom pravobranilaštvu za općine Čelić i Doboj Istok i*
  2. *Razmatranje prijedloga za finansiranje rada Zajedničkog pravobranilaštva za općine Čelić i Doboj Istok.*

*Obrazloženje: Razlog za proširenje dnevnog reda je da se angažuje osoba koja će raditi poslove općinskog pravobranioca u Zajedničkom pravobranilaštvu za općine Čelić i Doboj Istok do konačnog imenovanja općinskog pravobranioca, kao i da se obezbijede sredstva za rad novonastalog Zajedničkog pravobranilaštva u narednom periodu.*

*Ima li potrebe za dodatnim pojašnjenjem? Nema. Ko je za da se u dnevni red uvrsti sljedeća tačka: Razmatranje Odluke o imenovanju privremenog općinskog pravobranioca u Zajedničkom pravobranilaštvu za općine Čelić i Doboj Istok? Ko je za?*

*Glasanje: ZA – 17, PROTIV – 0, UZDRŽANIH – 0.*

*Ko je za da se uvrsti u dnevni red sljedeća tačka: Razmatranje prijedloga za finansiranje rada Zajedničkog pravobranilaštva za općine Čelić i Doboj Istok? Ko je za?*

*Glasanje: ZA – 17, PROTIV – 0, UZDRŽANIH – 0.*

*Znači obje tačke će biti uvrštene u dnevni red i za današnju 9. redovnu sjednicu 7. saziva Općinskog vijeća Doboj Istok predlažem sljedeći dnevni red:*

- 1. Razmatranje i usvajanje prijedloga Odluke o primjeni Odluke o proglašenju ulica i trgova na području općine Doboj Istok,*
- 2. Razmatranje i usvajanje prijedloga Odluke o osnivanju Zajedničkog pravobranilaštva za općine Čelić i Doboj Istok,*
- 3. Razmatranje prijedloga za finansiranje rada Zajedničkog pravobranilaštva za općine Čelić i Doboj Istok,*
- 4. Razmatranje i usvajanje prijedloga Odluke o raspisivanju javnog oglasa za izbor i imenovanje Općinskog pravobranioca u Zajedničkom pravobranilaštvu za općine Čelić i Doboj Istok,*
- 5. Razmatranje ostavke Lejle Hasanović iz Tuzle na mjesto privremenog općinskog pravobranioca u Zajedničkom pravobranilaštvu za općine Čelić i Doboj Istok,*
- 6. Razmatranje i usvajanje prijedloga Odluke o imenovanju privremenog općinskog pravobranioca u Zajedničkom pravobranilaštvu za općine Čelić i Doboj Istok,*
- 7. Razmatranje i usvajanje prijedloga Odluke o usvajanju Nacrta Strateškog plana lokalnog razvoja općine Doboj Istok za period 2021 – 2027. godina,*
- 8. Razmatranje i usvajanje Izvještaja o provedenim izborima za organe mjesnih zajednica na području općine Doboj Istok,*
- 9. Razmatranje i usvajanje prijedloga Odluke o davanju saglasnosti na Rješenje o potvrđivanju rezultata izbora za članove savjeta mjesnih zajednica u općini Doboj Istok,*
- 10. Razmatranje i usvajanje prijedloga Odluke o visini naknade za rad licima angažovanim za provodjenje izbora u mjesnim zajednicama,*
- 11. Razmatranje i usvajanje prijedloga Odluke o odbijanju žalbe Mujkić Ćazima iz Klokotnice izjavljene na Rang listu za dodjelu stipendija redovnim studentima za akademsku 2020/21,*
- 12. Razmatranje i usvajanje prijedloga Konačne rang liste za dodjelu stipendija redovnim studentima,*
- 13. Razmatranje i usvajanje prijedloga Konačne odluke o dodjeli stipendija redovnim studentima dodiplomskog studija za akademsku 2020/2021. godinu,*
- 14. Razmatranje i usvajanje Izvještaja o realizaciji budžeta općine Doboj Istok za period januar-juni 2021. godinu*
- 15. Razmatranje i usvajanje Izvještaja o utrošku sredstava budžetske rezerve za period januar-juni 2021. godinu*
- 16. Razmatranje i usvajanje Informacije o stanju u privredi u općini Doboj Istok za 2020. godinu*
- 17. Razmatranje i usvajanje Informacije o uspjehu sportskih klubova u takmičarskoj sezoni 2020/2021. godina*
- 18. Razmatranje i usvajanje Informacije o provedenim aktivnostima povodom obilježavanja Dana brigade*

*Ko je za ovakav dnevni red?“*

*Glasanje: ZA – 17, PROTIV – 0, SUZDRŽANIH – 0.*

### **REALIZACIJA DNEVNOG REDA**

***1. Razmatranje i usvajanje prijedloga Odluke o primjeni Odluke o proglašenju ulica i trgova na području općine Doboj Istok.***

*Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“*

*Glasanje: ZA – 17, PROTIV – 0, SUZDRŽANIH – 0*

**2. Razmatranje i usvajanje prijedloga Odluke o osnivanju Zajedničkog pravobranilaštva za općine Čelić i Doboj Istok.**

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, SUZDRŽANIH – 0

**3. Razmatranje i usvajanje prijedloga za finansiranje rada Zajedničkog pravobranilaštva za općine Čelić i Doboj Istok.**

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, SUZDRŽANIH – 0

**4. Razmatranje i usvajanje prijedloga Odluke o raspisivanju javnog oglasa za izbor i imenovanje Općinskog pravobranioca u Zajedničkom pravobranilaštvu za općine Čelić i Doboj Istok.**

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, SUZDRŽANIH – 0

**5. Razmatranje ostavke Lejle Hasanović iz Tuzle na mjesto privremenog općinskog pravobranioca u Zajedničkom pravobranilaštvu za općine Čelić i Doboj Istok.**

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za prihvatanje ove ostavke uz prijedlog Rješenja o prihvatanju ostavke? Znači, prihvata se ostavka Lejle Hasanović iz Tuzle imenovane na poziciju vršioca dužnosti zajedničkog općinskog pravobranioca za općine Čelić i Doboj Istok. Imenovanoj prestaje služba u Zajedničkom općinskom pravobranilaštvu za općine Čelić i Doboj Istok zaključno sa 30.09.2021. godine. Ovo Rješenje stupa na snagu danom donošenja, a objavit će se u “Službenim novinama općine Doboj Istok“. Ko je za prihvatanje ostavke uz ovo rješenje?“

Glasanje: ZA – 17, PROTIV – 0, SUZDRŽANIH – 0

**6. Razmatranje i usvajanje prijedloga Odluke o imenovanju privremenog općinskog pravobranioca u Zajedničkom pravobranilaštvu za općine Čelić i Doboj Istok.**

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, SUZDRŽANIH – 0

**7. Razmatranje i usvajanje prijedloga Odluke o usvajanju Nacrta Strateškog plana lokalnog razvoja općine Doboj Istok za period 2021 – 2027. godina.**

Selmin Karić, predsjedavajući Općinskog vijeća: „Tačku dajem na diskusiju. Komisija za budžet, finansije, privredu i dijasporu je na svom sa sastanku između ostalog razmatrala i ovu tačku. Strateški plan lokalnog razvoja je jedan od najbitnijih dokumenata za razvoj svake lokalne zajednice, pa i ove naše, jer ona obuhvata sve sfere bitne za život u jednoj lokalnoj zajednici i to društvenu, ekonomsku i sferu zaštite životne sredine, naravno poštujući Prostorni plan opštine. S obzirom da je ova strategija sveobuhvatna, bitno je i to da ide u obliku nacrta kroz javnu raspravu, kroz koju će i svi oni građani naše lokalne zajednice koji budu zainteresovani moći dati određene prijedloge ili sugestije na predloženi plan. S obzirom da su prilikom izrade ove

Strategije uzeti u obzir i strateški pravci, prioriteti i mjere Strategije razvoja Tuzlanskog kantona za period 2021-2027. godina, Komisija smatra da su ispunjeni svi preduslovi da ovaj dokument ide u Javnu raspravu, nakon koje će se pripremiti prijedlog Odluke o usvajanju Strateškog plana lokalnog razvoja općine Doboj Istoka za period 2021-2027. godina uz sve sugestije koje budu bile. Ima li prijavljenih? Nema. Ko je za prihvatanje prijedloga Odluke o usvajanju Nacrta Strateškog plana lokalnog razvoja općine Doboj Istok za period 2021 – 2027. godina uz sljedeći zaključak: Prihvata se nacrt Strateškog plana lokalnog razvoja općine Doboj Istok za period 2021 – 2027. godina uz konstataciju da predloženi nacrt može poslužiti kao osnova za izradu prijedloga Strateškog plana lokalnog razvoja općine Doboj Istok za period 2021 – 2027. godina. Nacrt Strateškog plana lokalnog razvoja općine Doboj Istok za period 2021 – 2027. godina objavit će se na web stranici Općine Doboj Istok i oglasnoj tabli Općine Doboj Istok Javna rasprava traje do 18.10.2021. godine. Mišljenja i prijedloge građani i pravna lica mogu pismeno dostaviti na protokol Općine Doboj Istok, na fax Općinskog vijeća broj: 035/722 – 097 ili na e – mail: [opcinsko.vijece@opcinadobojistok.ba](mailto:opcinsko.vijece@opcinadobojistok.ba) Mišljenja i prijedloge koji su dati u periodu održavanja javne rasprave, razmatrat će Općinski načelnik prilikom pripreme prijedloga Strateškog plana lokalnog razvoja općine Doboj Istok za period 2021 – 2027. godina. Zaključak će se dostaviti Općinskoj službi za poduzetništvo i finansije i Općinskoj službi za društvene djelatnosti, branilačko – invalidsku zaštitu i opću upravu, a objavit će se u «Službenim novinama općine Doboj Istok». Znači, ko je za usvajanje ove tačke uz ovaj zaključak?“

Glasanje: ZA – 17, PROTIV – 0, SUZDRŽANIH – 0.

#### **8. Razmatranje i usvajanje Izvještaja o provedenim izborima za organe mjesnih zajednica na području općine Doboj Istok.**

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 12, PROTIV – 0, SUZDRŽANIH – 5

Tačka je dobila potrebnu većinu.“

#### **9. Razmatranje i usvajanje prijedloga Odluke o davanju saglasnosti na Rješenje o potvrđivanju rezultata izbora za članove savjeta mjesnih zajednica u općini Doboj Istok.**

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 12, PROTIV – 0, SUZDRŽANIH – 5.

Tačka je dobila potrebnu većinu sa 12 glasova za.“

#### **10. Razmatranje i usvajanje prijedloga Odluke o visini naknade za rad licima angažovanim za provodjenje izbora u mjesnim zajednicama.**

Selmin Karić, predsjedavajući Općinskog vijeća: „Tačku dajem na diskusiju. Ima li još prijavljenih? Nema. Ko je za?“

Glasanje: ZA – 13, PROTIV – 1, SUZDRŽANIH – 3.

Znači, sa 13 glasova tačka je dobila potrebnu većinu.“

#### **11. Razmatranje i usvajanje prijedloga Odluke o odbijanju žalbe Mujkić Ćazima iz Klokočnice izjavljene na Rang listu za dodjelu stipendija redovnim studentima za akademsku 2020/21.**

Selmin Karić, predsjedavajući Općinskog vijeća: „Tačku dajem na diskusiju. Ima li još prijavljenih? Nema. Ko je za?“

Glasanje: ZA – 11, PROTIV – 0, SUZDRŽANIH – 6.

Sa 11 glasova za tačka je dobila potrebnu većinu.“

## **12. Razmatranje i usvajanje prijedloga Konačne rang liste za dodjelu stipendija redovnim studentima.**

*Selmin Karić, predsjedavajući Općinskog vijeća: „Tačku dajem na diskusiju. Ima li još prijavljenih? Nema. Ko je za?“*

*Glasanje: ZA – 17, PROTIV – 0, SUZDRŽANIH – 0.*

## **13. Razmatranje i usvajanje prijedloga Konačne odluke o dodjeli stipendija redovnim studentima dodiplomskog studija za akademsku 2020/2021. godinu.**

*Selmin Karić, predsjedavajući Općinskog vijeća: „Tačku dajem na diskusiju.“*

*Izet Hodžić, zamjenik predsjedavajućeg Općinskog vijeća: „ Osjećam potrebu da malo pojasnim mada ste u materijalima sve dobili. Kao predsjednik komisije ili radnog tijela Općinskog vijeća koje je nadležno za ovu oblast želim da upoznam prisutne vijećnice i vijećnike da je procedura provedena, kao i prethodnih godina, u skladu sa propisanim pravilnikom od momenta raspisivanja javnog poziva za dostavljanje dokumentacije za dodjelu stipendija. Poslije toga u predviđenom roku pristigle su prijave i komisija je zasijedala i pregledala da li sve prijave ispunjavaju propisane uslove i čini mi se da jedan student nije ispunjavao uslove predviđene pravilnikom. Komisija je izvršila bodovanje i tu preliminarnu rang listu smo postavili na web stranici i na oglasnoj ploči Općine Doboj Istok. Predviđeni rok za žalbe je bio 8 dana i po isteku tog roka Komisija je zaprimila jednu žalbu i evo prije dvije tačke ste imali priliku da vidite o čemu se radi. Znači jedan student se žalio i po mišljenju komisije i po pravilniku koji je na snazi mi smo bili jednoglasnog stava da ta žalba nije osnovana i dali smo Općinskom vijeću na potvrđivanje, odnosno na usvajanje tog mišljenja Komisije. Poslije toga dobili smo konačnu rang listu koja je na pretodnoj tački usvojena. Drago mi je što je ta Konačna rang lista usvojena jednoglasno za 15 naših studenata kojima će biti dodijeljene stipendije iz općinskog budžeta u ovoj akademskoj godini. Imali smo pitanja i želim da pojasnim zbog čega se čekalo sa procedurom. Mi kao članovi Komisije smo mišljenja da je to opravdano i za one koji ne znaju želim da vas informišem da Ministarstvo za boračka pitanja isto raspisuje poziv za dodjelu stipendija i mi smo čekali da naši studenti koji su dobili stipendije potpišu sa Ministarstvom ugovor o stipendiranju kako bi se stvorio prostor da što više studenata dobije stipendiju i na nivou Kantona i na nivou Opštine. Sa ponosom mogu da kažem da je u ovoj godini 40 studenata sa područja općine Doboj Istok potpisalo te stipendije sa Kantonom. Evo okončana je procedura i ja kažem zadovoljan sam sa svom provedenom procedurom i imamo prvih 15 studenata. Želim da kažem da mimo ovih 15 studenata i student pod rednim brojem 16 će imati stipendiju. Zamoljen sam da ne govorim, ali ja osjećam potrebu da kažem da je doktor Omerhodžić izrazio želju da stipendira jednog studenta sa područja općine Doboj Istok. Takođe ovaj student koji je uložio žalbu, jer da su dokumenti koje je on naknadno dostavio po isteku procedure bili tu, on bi sigurno bio među prvih 15, dobit će stipendiju u punom iznosu, jer je općinski načelnik izrazio želju da iz vlastitih sredstava stipendira tog našeg studenta. Takođe želim sa ponosom da istaknem da je Općinsko povjereništvo Narod i pravda na sastanku u utorak donijelo odluku da dodijeli dvije stipendije studentima koji nisu dobili stipendije, a imaju izuzetno visok prosjek ocjena Beširević Amin sa prosjekom 8,88 i Junuzović Maid sa prosjekom 8,50. Znači politički subjekt Narod i pravda, Općinsko povjereništvo Doboj Istok će dodijeliti za ova dva studenta stipendije u punom iznosu. Može biti shvaćeno kao politički marketing i ako neko misli da jest prostora za djelovanje političkog marketinga ima još. Nama nije bio cilj da to promovišemo na takav način, jer iskren mi je nijet, ali osjećam potrebu da to trebam priopćiti za govornicom. Drugi dio koji želim da kažem je da je na zadnjoj sjednici Komisije za mlade dogovoreno da se na jednoj od narednih sjednica Općinskog vijeća uputi na razmatranje i nadam se na usvajanje prijedlog izmjena pravilnika o dodjeli stipendija. O čemu se konkretno radi? Svi znamo da se studenti koji imaju prosjek ocjena od 9 do 10 ne boduju i automatski im se dodjeljuje stipendija. Mi smo mišljenja u komisiji da se spusti taj prag na 8,50 od naredne godine. Takođe ćemo*

predložiti prilikom kreiranja općinskog budžeta za 2022. godinu i nadam se da će i taj prijedlog biti prihvaćen, da se poveća iznos za dodjelu stipendija minimalno za još pet stipendija i da bude 20 stipendija. Treća stvar koju je komisija razmatrala na svom sastanku, jer uočili smo, neću reći neregularnost, ali nije u redu što se tiče bodovanja za djecu koja pripadaju boračkim porodicama. Mi smo mišljenja da nije u redu i da ne bi trebalo imati isto bodova npr. dijete koje ima potvrdu da je roditelj bio pripadnik patriotske lige, a nema dana učešća u Armiji BiH i pokušat ćemo da sve precizno bude u našem prijedlogu. Mišljenja smo takođe da nije u redu da isto bodova nosi dijete čiji je roditelj bio 4 godine u ratu i čiji je roditelj bio 3 ili 6 mjeseci. Znači pokušat ćemo da napravimo prijedlog izmjene pravilnika da jednostavno bude bodovano što se tiče tog dijela po godinama pripadnosti Armiji BiH za djecu čiji su roditelji bili u Armiji BiH. To je to što sam imao za reći i ako smatrate i ako ima pitanja vezano za ovu tematiku stojim na raspolaganju.“

Emira Karić, predsjednica kluba vijećnika SDP: „ Pozdravljam sve prisutne i smatram ovo interventnom svojom diskusijom, jer sam se zaista zatekla vezano za prethodnu diskusiju i morat ću ovdje neke stvari pojasniti. Prije svega što se tiče tih dodjela stipendija nije problem svako ima pravo za ovom govornicom reći šta želi, a vjerujte mi da ću i ja od sada koristiti i šta ja lično dodjeljujem i šta moja stranka dodjeljuje. Imala bih i na ovoj sjednici sadržaja, moja kolegica zna za neke aktivnosti, ali ne želim. Nemojte se sa tim služiti i ako ćemo tako onda ćemo na ovoj sjednici po sat vremena ko je šta uradio i šta je ko kome dao itd. Molim vas vezano za patriotsku ligu susretala sam se na konkursu JU Osnovna škola „Brijesnica“ i budite jako obazrivi. Zakon je svoje rekao, zna se šta je branitelj od kojeg do kojeg datuma. Što se tiče 8,50, opet kažem mi nismo u komisiji i nemamo većinu, ja lično znam 5 – 6 studenata koji imaju prosjek preko 8,50 i hajmo reći da su u imućnom stanju i da se razmisli o toj granici. Kažem trenutno znam 5 studenata koji imaju taj prosjek i bojim se da ćemo ove druge studente ... ali ako ćemo ići ka više stipendija onda je u redu i to je zaista motivaciono. Kažem samo da razmislite i nemojte taj jaz od studenata koji imaju taj prosjek, jer i moja kćerka ima 8,90 i ona bi ovdje odmah predala bez obzira što bih ja rekla nemoj predavati, jer bi rekla da ima pravo. Smatram da 9 zaista zaslužuje i da svako može i onaj ko ima 8,50 da malo nagura na tu devetku. To je moj stav i za sada toliko.“

Izet Hodžić, zamjenik predsjedavajućeg Općinskog vijeća: „ Što se tiče tačke dnevnog reda i mog obraćanja ja sam ubijeden da sam se držao tačke dnevnog reda, da imam pravo za ovom govornicom i ne treba mi niko objašnjavati koja su moja prava i koje su obaveze. Ja mislim da je korektno obraćanje bilo i ja sam pozvao ako ima predstavnika drugih političkih partija bujrum evo prostora za reklamu. Ne vidim potrebe da meni neko govori šta trebam ja da kažem. Ja mislim da je moje obraćanje bilo sasvim korektno. Što se tiče ovog dijela ja sam rekao da će komisija razmatrati i dati prijedlog i ne mora biti 100 % da će tako biti, jer uvažit ćemo mišljenje svih diskutanata na sjednici Općinskog vijeća kada se bude o tome raspravljalo. Znači mišljenja smo mi i po informacijama iz okruženja da bi trebalo tako da bude, a da li će biti, vidjet ćemo.“

Emira Karić, predsjednica kluba vijećnika SDP: „ Kratka replika. Nisam rekla da nemate pravo, rekla sam da za ovom govornicom ima svako pravo reći šta hoće, ali da ćete samo izazvati u meni kontrareakciju, odnosno i ja ću iznositi takve i slične stvari što ne bih voljela.“

Selmin Karić, predsjedavajući Općinskog vijeća: „ Zahvaljujem. Ima li još neko? Ko je za usvajanje prijedloga Konačne odluke o dodjeli stipendija redovnim studentima dodiplomskog studija za akademsku 2020/2021. godinu?“

Glasanje: ZA – 17, PROTIV – 0, SUZDRŽANIH – 0.

#### **14. Razmatranje i usvajanje Izvještaja o realizaciji budžeta općine Doboj Istok za period januar-juni 2021. godinu**

*Selmin Karić, predsjedavajući Općinskog vijeća: „Tačku dajem na diskusiju. Komisija za budžet, finansije, privredu i dijasporu je razmatrala i ovu tačku dnevnog reda i iz ovog izvještaja može se vidjeti da je ukupno izvršenje budžeta na prihodima 52,67 %, odnosno 1.933.312,35 KM, a na rashodima 45%, odnosno 1.659.236,79 KM, sa razlikom od 7,67 %, iz čega se može zaključiti da su u izvršenju budžeta prihodi pratili rashode, te da je budžet realno planiran. Izvršenje budžeta na prihodima je za 2,67% veće od plana, a na rashodima je 5% manje od plana, te za ovaj period imamo ostvaren višak prihoda nad rashodima u iznosu od 274.075,56 KM, što je više nego dobar rezultat i za svaku pohvalu. Ono što je vidljivo i što je bitno naglasiti su prihodi od direktnih poreza, odnosno poreza na dohodak fizičkih lica od nesmostalne djelatnosti gdje imamo izvršenje od 80,19%, a od indirektnih poreza je 51,69 %, te su veći za 1,69 % od plana, što je izuzetno dobro i ohrabrujuće obzirom da su indirektni porezi osnova svih budžeta, pa i ovog našeg općinskog budžeta i uglavnom čine 1/3 svih prihoda. Ono što je bitno kod rashoda je da su rashodi za plate pratili plan sa 47 % izvršenja. A inače i ostali rashodi u manjoj ili većoj mjeri su pratili plan budžeta. Ima li prijavljenih? Nema. Ko je za usvajanje Izvještaja o realizaciji budžeta općine Doboj Istok za period januar-juni 2021. godinu?*

*Glasanje: ZA – 11, PROTIV – 0, SUZDRŽANIH – 6*

*Sa 11 glasova za izvještaj je dobio potrebnu većinu.“*

#### **15. Razmatranje i usvajanje Izvještaja o utrošku sredstava budžetske rezerve za period januar-juni 2021. godinu**

*Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za usvajanje ovog Izvještaja?“*

*Glasanje: ZA – 17, PROTIV – 0, SUZDRŽANIH – 0*

#### **16. Razmatranje i usvajanje Informacije o stanju u privredi u općini Doboj Istok za 2020. godinu**

*Selmin Karić, predsjedavajući Općinskog vijeća: „Tačku dajem na diskusiju. Iz ove informacije se može zaključiti da je stanje u privredi dosta zadovoljavajuće, uzimajući u obzir da je i pored pandemije koja je zahvatila cijelo naše okruženje, pa i cijeli svijet u konačnici, a što je uzrokovalo određen pad privredne aktivnosti na našoj općini, ali ipak nije došlo do znatnijeg pada zaposlenosti u prethodnoj godini. Iako je, kao što ste vidjeli u informaciji, došlo do smanjena ukupnih prihoda naših privrednih subjekata, istovremeno je također došlo i do smanjena ukupnih rashoda, te u konačnici do povećanja ukupne dobiti privrednih subjekata u odnosu na 2019. godinu, što je za svaku pohvalu i čestitke našim privrednicima koji su opstali u takvim uslovima. Ima li prijavljenih? Nema. Ko je za Informaciju?“*

*Glasanje: ZA – 17, PROTIV – 0, SUZDRŽANIH – 0*

*Izet Hodžić, zamjenik predsjedavajućeg Općinskog vijeća je tražio pauzu.*

*Predsjedavajući je dao pauzu od 5 minuta.*

*Sjednica je nastavljena u 10,50 sati.*

#### **17. Razmatranje i usvajanje Informacije o uspjehu sportskih klubova u takmičarskoj sezoni 2020/2021. godina**

*Selmin Karić, predsjedavajući Općinskog vijeća: „Tačku dajem na diskusiju.“*



*Kemal Skopljak, vijećnik BPS Sefer Halilović: „Prije svega želim da čestitam svim klubovima na postignutim rezultatima. Znam da su teška vremena i znam da su se borili i radili koliko su mogli, uložili sredstava sa strane koliko su mogli i mi smo im, što se tiče Općine, pomogli koliko smo mogli. Međutim, želim da se referišem na jedan klub tj. Mladost Brijesnica. Klub je trenutno u katastrofalnom stanju i mislim da od samog formiranja nikada nije bio u gore m stanju. Upitna je utakmica u nedjelju da li će moći da odrade. Ne govorim ovo da okrivljujem bilo koga, nego želim da se vratim malo unazad i da drugi klubovi izvuku neku pouku. Ja sam dugogodišnji sportski radnik, bio sam i kao igrač i kao trener i znam kako treba raditi i šta treba raditi u tim klubovima. Glavni problem u klubu Mladost Brijesnica jeste ne planiranje, ne organizovanje kako treba i nerad sa mlađim kategorijama koje smo totalno zapostavili. Sva ova sredstva koja mi izdvajamo i ako treba da dajemo da neki klub treba da bude u prvoj ili drugoj federalnoj ligi pogrešno dajemo. Sredstva koja dajemo treba uložiti u djecu, u našu omladinu, u naše pionire i kadete i iz toga crpiti, kao i do sada, naše talente i naše igrače i kada dođemo na naše terene, na naše igralište, da gledamo svoje. Ja nisam lokalista, ali uvijek volim pogledati dijete iz Klokotnice, Brijesnice Male i Brijesnice Velike da igraju na stadionu našem nego nekoga iz Doboja, Tešnja ili ne znam odakle. Uvijek smo imali igrača sa strane, ali ne u ovom broju i to je upravo ovo o čemu sada pričam dovelo Mladost Brijesnicu do bezizlazne situacije. Znači nema odakle povući svog igrača, jer nismo ih napravili samo zbog toga što smo pogrešno ulagali sredstva koja dobijemo, jer ulagali smo sve u prvu ekipu, plaćali igrače sa strane i plaćali da ostanemo u ligi. Ja govorim otvoreno i šta smo dobili time, nismo dobili ništa. Bolje da smo spali na niži rang, organizovali se bolje, pokupili našu djecu i počeli raditi od nule. Ne krivim nikoga, ali govorim da bi i mi trebali na neki način uticati odavde i da skrenemo pažnju tim ljudima tamo koji rade da nije preči jedan trener od 700 KM koji se plati, da je preči ovaj pionir, da se njemu naprave uslovi i daju realne mogućnosti da trenira i da njega neko uči. Mi toga nemamo. Uložili smo puno u infrastrukturu i na tome sam zahvalan, jer dobili smo tribine, dobili smo rasvjetu, ali nemamo naše djece. Samo sam to htio da kažem.“*

*Izet Hodžić, zamjenik predsjedavajućeg Općinskog vijeća: „ Po ovoj tački osjećam potrebu da kažem par rečenica. Znači imamo informaciju o uspjehu sportskih kolektiva, odnosno klubova za takmičarsku 2020/2021. godinu. Ja u svoje lično ime želim da prije svega čestitam rukovodstvu svih klubova, a čini mi se da ima 10 klubova u okviru Sportskog saveza općine Doboje Istok, u ova teška vremena, pogotovo u prošloj 2020. godini, jer znamo kakva je situacija bila kada je pandemija bila u punom jeku. Znači čestitam i zahvaljujem se rukovodstvu klubova i igračima i trenerima prije svega na opstanku, a poslije toga na postignutim rezultatima. Kao i u prethodnim godinama ima klubova gdje su ti rezultati stvarno impozantni, pogotovo u pojedinačnim sportovima Atletski klub, Stonoteniski klub, Karate klub, Šahovski klub itd. U ovim sportovima ekipnim, gdje je ligaško natjecanje tu je malo teža situacija što se tiče rezultatskog dijela. Znači, sam opstanak u ovim vremenima gdje je došlo do gašenja pojedinih klubova i odlaska u najniži rang takmičenja klubova koji su se takmičili u najelitnijem rangu takmičenja u premijer ligi, govorim konkretno za fudbal, pokazatelj je da se radilo ispravno. Ovdje je neupitno, kao što kolega Kemal reče podrška same Općine, jer se zna koliko je sredstava planirano u općinskom budžetu za realizaciju programskih ciljeva klubova i Sportskog saveza. Znači općinski načelnik, odnosno iz općine su ta sredstva i podijeljena. Ja znam da je svaki klub dobio i više od planiranih sredstava, a cilj je bio opstojnost i opstanak tih klubova. Takođe želim da iskoristim priliku da se zahvalim rukovodstvu Sportskog saveza općine Doboje Istok koji stvarno radi kvalitetno svoj posao na čelu sa kolegom Hasanom Hasančevićem. Ja se na terenu susrećem sa ljudima koji su u sportu, koji su u klubovima i vjerujte neću reći što se tiče te materijalno finansijske situacije i podrške od strane općine da ne može bolje, ali i ovo što se izdvaja i što su nekakvi evropski standardi, odnosno svjetski standardi da se iz budžeta lokalnih zajednica nekih 5% izdvaja za sport u odnosu na budžet. Znači dobra je situacija i ja kažem može sigurno bolje. Ono što sam htio da kažem u razgovorima sa pojedinim ljudima koji vode klubove, konkretno koji se natječu u našoj ligi da svi klubovi imaju problema i mi ovdje u općini Doboje Istok imamo problema što se tog dijela tiče. Zato svi zajedno treba da damo svoj maksimum, svoj doprinos kao izabrani*

dužnosnici, odnosno vijećnici, u razvoju i opstojnosti u bitisanju svih klubova. Znači i klubovi međusobno da pomažu jedni druge koliko je to u mogućnosti, a sve u cilju promovisanja i održivosti sporta na području općine Doboj Istok. Ja se djelimično slažem sa diskusijom kolege Kemala i mišljenja sam da bi u nekom, ne dugoročnom nego kratkoročnom periodu, bilo dobro održati posebnu tematsku sjednicu Općinskog vijeća gdje bi bili prisutni ljudi iz Sportskog saveza i ljudi koji su na čelu klubova da se sagledaju problemi sa kojima se susreću ti klubovi. Nije to baš sve tako crno i bijelo. Vjerujem da je svakom klubu u interesu da ima omladinski pogon, ali vjerujte na terenu je to sasvim drugačija slika. Ovako sa strane kada se gleda i ne umanjujem ovo što je Kemo rekao vezano za njegovo iskustvo kao igrač i trener i član uprave, ali vjerujte da se ne može povlačiti paralela za 2020 i 2019. i ovu godinu, a kamoli da se vratimo unazad 10 godina i da kažemo kako je tada bilo, a kako je sada. Znači, nemoguće je povlačiti paralelu što se tiče tog dijela, jer je jednostavno nemoguće i nemojte mi zamjeriti, a ja ću vam navesti primjer iz kluba iz kojeg ja dolazim. Mi smo pozvali kadetsku selekciju ove godine, kao i prethodne godine, da bude sve besplatno, ali jednostavno nema odziva te djece. Ne opravdavam, jer može se sigurno napraviti sve to, međutim ja ne opravdavam sebe, ali kako vrijeme odmiče sve je teže animirati tu djecu pogotovo u uzrastu o kojem govorimo kadetske i juniorske selekcije. Kažem nije nemoguće i ubijeđen sam da to može, ali treba dosta više truda, energije i htijenja.“

Hasan Hasančević, predsjednik kluba vijećnika SDA: „Sve vas iskreno selamim i pozdravljam. Evo kao predsjednik Sportskog saveza dužan sam da uzmem riječ za ovom govornicom. Znači misija Sportskog saveza u ovim turbulentnim vremenima je bila da opstanu klubovi u korona pandemiji. Manje smo se bazirali na rezultate, ali mislim da su rezultati dobri, a imali smo i gubitak jednog od najboljih sportista u prošlom vremenu Osmana Junuzovića rahmetli, tako da je i to malo pogodilo i poremetilo neke stvari. Polovinu sredstava koja idu iz općine Doboj Istok prema Sportskom savezu, a onda dalje prema klubovima, odnose NK Doboj Istok i Mladost. Što je to tako, neko je sjeo prije i dogovorio se da tako treba da bude zbog ligaškog takmičenja. Evo mi kao sportski radnici pričamo sada i kao vijećnici problem je preuzeti klub i biti član upravnog odbora, odnosno bilo kakvog odbora u bilo kojem sportskom kolektivu. Ja ću biti ovdje otvoren, pogotovo u NK Mladost Brijesnica ovo što kolega Kemal priča, svaki dan se priča o članovima upravnog odbora i o stanju unutar svih klubova, a ova dva pogotovo. Složio bih se sa svima koji tvrde da omladinske selekcije, odnosno djeca treba da budu konzumenti sredstava koja daje društvena zajednica. Međutim, kada dođemo tamo na teren i kažemo hajmo od dva kluba napraviti jedan dolazimo do problema. Sa jedne strane malo više, a sa druge malo manje, ali ima problema sa obje strane. Da bi napravili takvu ideju onda bi uvažene kolege i kolegice imali i tri selekcije u takmičarskom pogonu i predpionire i sve to u obadva kluba u jednom i imali bi sve ovo o čemu pričamo. Međutim svi mi pričamo nismo lokalisti, nismo ovo, nismo ono, a kada dođemo na teren da se rješava... Znači, nije tema ovo tačke dnevnog reda, ali da razmislimo kada odemo kući da je to tako. Da je to tako ni u NK Mladost ni u NK Doboj Istok nema ni jedne omladinske selekcije, ali tamo je situacija malo gora zbog x faktora. U nedjelju je Di-five imao, a takmiči se u ligi predpioniri i pioniri, pun autobus i možda 50 kola roditelja došlo na utakmicu, a to je više nego i na jednoj ili zajedno u prvoj kantonalnoj ligi gledalaca. Što je to tako treba otići na utakmice pa se zapitati ili doći na sastanak upravnog odbora. Ja nisam htio prihvatiti da budem član upravnog odbora, a ni predsjednik NK Doboj Istok u zadnjem mandatu, zahvalio sam se ljudima, jer ne mogu to fizički prihvatiti, nisam u stanju i to je to. Svaka čast onima koji rade i hajde da im pomognemo svi. Kod nas je problem, hajmo biti otvoreni i političke je prirode, jer onaj je u klubu i neću ja ići sa njim, a nema veze sa vezom. Prije 11 – 12 godina kada sam ja postao komesar za bezbjednost NK Doboj Istok meni je jedan kolega odavde rekao ti si redar GDS-a. Ovako doslovce je bilo, što nema veze sa vezom. Znači bio je da li Izet predsjednik ili neko drugi u toj stranci, a ja komesar za bezbjednost NK Doboj Istok na određenoj utakmici. To je naš problem generalno i sada negdje malo više, a negdje malo manje, ali je problem. Mi ako želimo stabilne klubove moramo svi pomoći bez obzira ko je šta je i odakle je. Nije to samo dati novčana sredstva, pa kritikovati one što rade, jer da bi otišao na jednu utakmicu u nedjelju treba

makar 1000 da budeš na nuli, da li platio prevoz ili platio sudije kod kuće i markiranje itd. i to puta 30, to je samo 30.000 i da ne pričamo o ovome o čemu je Kemal pričao o plaćanju igrača. Iz toga dolazimo do ovoga da nema rezultata. Meni je rezultat kao predsjedniku Sportskog saveza da makar po jednu omladinsku selekciju imaju ova dva kluba, makar po jednu i to je rezultat, jer će sklonuti sa ulice 20 – tak dječaka određenog godišta i opravdat će sva sredstva koja ulažu. Pošto nije tema, mi imamo opštinski nogometni savez ko država, ko beton jaki. Sve institucije postoje od nule, pa do vrha i neka opštinski nogometni savez uzme sebi za pravo da razmatra stanje u klubu ili klubovima i neka predlože Vijeću i Sportskom savezu koje je rješenje određenih problema i da svi idemo u rješavanje. U ostalim klubovima nema problema i ako ima finansijske prirode zahvalio bih se općinskom načelniku što interventno pomogne da djeca odu na koje bilo takmičenje i privrednicima i to je to. Znači nema ove vrste problema koja imaju ova dva kluba, a oni su srž i Sportskog saveza i finansiranja i broja djece, odnosno učesnika u tome, ali nažalost udruženja su građana i do usvajanja Zakona o sportu bit će tako.“

Kemal Bratić, općinski načelnik: „ Pošto se prvi puta javljam sve vas selamim i pozdravljam. Šta reći, a da me neko krivo ne shvati. I Barcelona ima problema, onakav gigant i meni je drago radi nekih ovdje što Barcelona ima problema. Ovo o čemu je Skopljak pričao, iako nije tačka dnevnog reda, ne mogu da se ne dotaknem, jer smatram NK Mladost i svojim klubom, nema veze što sam iz Klokočnice. To je naša mana generalno, govorit ću za naše područje, da izaberemo nekoga na neku poziciju da vodi neko udruženje i onda ga ostavimo samog, pa sjednemo negdje na kafi i kritikujemo ga, a nismo ništa poduzeli da pomognemo ni njemu ni tom udruženju koje vodi. Ja se iskreno nadam i ubijeden sam da u Velikoj Brijesnici ima toliko snage, pameti i moći da neće dozvoliti da se to desi sa našom Mladosti. Ja sam koliko je to bilo u mojoj moći pomogao. Međutim, desi se tamo nekada da je načelnik kriv, jer je Mladost izgubila ili ako je Doboj Istok izgubio, a načelnik niti se u to petlja, niti se je kada petljao, niti će se petljati, ne pada mi napamet. Šta je moj zadatak? Ako mogu pomoći ću onoliko koliko mogu, a i pomažem i ne samo ova dva kluba nego svaki klub. Znači pored onih redovnih budžetskih sredstava kao npr. kada su stonoteniseri imali prvenstvo pa smo im pomogli, pa su karatisti imali itd. To je naš zadatak, Bog nam je dao da smo na određenim pozicijama i naš zadatak je da im pomažemo onoliko koliko je u našoj moći. Mislio sam da će neko od prethodnih diskutanata reći ono što ću ja reći. Mi smo na klubu razgovarali i smatram, to je moje mišljenje i nemojte da me neko krivo shvati, da nam fali koordinacije između profesora i nastavnika tjelesnog odgoja i naših klubova. To je moje zapažanje. Navodim jedan pozitivan i odličan primjer gospodina Mujić Jasmina koji je radio taj posao, filtrirao one koji su na neki način nadareni za tu atletiku i forsirao i evo iz dana u dan postiže fantastične rezultate. Ja bih zamolio evo tu su dva direktora, a vjerujem da će se i treći pridružiti da malo obave razgovor. Ja koliko znam samo jedan ili dva profesora su u upravi jednog kluba na području naše općine. Dajte da napravimo koordinaciju, jer smo zaključili da se održi sastanak sa njima i ako ništa da pozitivno pričaju o našim klubovima i da usmjeravaju i filtriraju talente i preporučuju našim klubovima kako bi ih oni preuzeli i dalje ubacili u mašinu, upravo ovo o čemu smo razgovarali o proizvodnji mladih talenata, bez obzira koji je sport u pitanju. Nije samo fudbal ili nogomet prioritet kada se govori o sportovima, jer svaki sport je na svoj način interesantan i svaki sport je na svoj način dobar. Da li će biti bolje u nekom narednom periodu? Vidite evo generalno kada se govori o sportu i sportskim dešavanjima ima problema. Ima problema svugdje u svijetu ne samo kod nas u Bosni i Hercegovini. Na diskusiju koju je Hasan govorio ne bih se osvrtao, jer mislim da to treba da sazrije. Nije loša ideja, ali mislim da treba da sazrije. Sigurno bi bilo lakše svima i onima koji bi vodili i mislim da ima snage da se to napravi. Po meni to još uvijek nije, jer nema, neću reći sa jedne strane, nego nema volje ni sa jedne strane da se to desi, ali možda nekada bude i možda mi to nećemo doživjeti. Možda će nekada neke mlađe generacije staviti ad akta neke stvari i riješiti upravo u cilju što boljeg prosperiteta tih naših klubova. Da li povećavati iznos za sport u narednom periodu, mene što se tiče, a Izet evo klima glavom, možemo ga malo i povećati, ali upravo ovo što je neko dobacio od vas prisutnih nemojte da povećavamo pa da dajemo tamo nekima koji rade to što rade, pa neko mora ući u svlačionicu, pa ga nakautirati, pa ga potjerati i ne ide to u dobrom pravcu. Mislim

*kada se radi, pogotovo u ovim nižim linijama, dok se nešto, ne daj Bože, ne desi ružno neće se ti ljudi okaniti tih stvari koje rade na utakmicama. Pogotovo, ja se usuđujem reći, mi smo ovdje dosta miroljubivi, pa dođu ovdje i treniraju strogoću i još naprave ono što jedan sudija ili neko drugi ne bi trebao praviti ovdje na klubu. Znači kada se radi o Mladosti stavljam se na raspolaganje da pomognem, ako neko bude mislio da mogu pomoći, ali ipak smatram da Velika Brijesnica, jer znam koliko svi iz Velike Brijesnice vole Mladost i da neće doći do ovoga što je moj adeš prije govorio. Može to biti određen momenat, određena slabost i nije se to samo u Mladosti desilo, dešavalo se to i u NK Doboj Istok, dešavalo se i u SPIN-u, u Karate klubu, jer izabaremo čovjeka da vodi udruženje i onda se jednostavno izmaknemo i pustimo ga samog. Trebamo svi unijeti i energije i volje i truda onoliko koliko možemo da pomognemo našim klubovima. Bez obzira na sve čestitam svim našim klubovima na postignutim rezultatima u vrijeme ove pandemije kada je bilo zabranjeno i prisustvo gledalaca u jednom periodu, a ipak su našli snage i umijeća da sačuvaju naše klubove.“*

*Mehmed Mehinović, vijećnik SBiH: „ Gospodine predsjedavajući, dopredsjedavajući, poštovani svi ostali sada mi je žao što se nisam javio, jer imao sam izvanrednu analizu za Informaciju o stanju u privredi u Doboj Istoku. Mislim čak da je bila korisna i mogu je predložiti budućim ulagačima koji bi htjeli ulagati u Doboj Istok da vide gdje su perspektive i kako je, međutim, zbog zdravstvenog stanja i nečeg još mislio sam i ne pričati nikako. Ovo je tema koja je potakla neki crv u meni i nisam mogao otpiti, a pred vama je čovjek koji kredibilno može pričati o ovoj stvari. Naime, od svoje 15. godine sam bio igrač u Mladosti, pa sam bio predsjednik kluba kada je Mladost ušla u regionalnu ligu, pa sam sada navijač i slažem se sa Kemom da teži dani nisu bili. Gledajući sa strane dođe i meni koji sam u ovako poznim godinama i ostalim penzionerima da se malo aktivnije uključimo da pokušamo riješiti taj problem. Kada sam rekao kredibilan ne zaboravite da sam '90. godine bio predsjednik tri kluba i ne znam gdje je izgubljen sav taj entuzijazam. Bio sam predsjednik Karate kluba u Doboju, Stonoteniskog kluba u Doboju i Mladosti u Brijesnici. Bio sam proglašen sportskim radnikom regije Doboja, a to je tada bilo od Žepča i Teslića do Odžaka i Modriče. Mladost je istorija. Mladost je oformljena '48. godine i to je već prešlo u istoriju, jer preko 50 godina kaže se da je to istorijski momenat, a o ljudskom životu da ne govorimo to je 73. godina i jedan ljudski život otprilike. Iz tih razloga sam ustao da kažem to, jer ne znam da li sami Brijesničani mogu iznijeti taj problem, neki neće zbog ovakvih ili onakvih razloga i ja često pričam o tom problemu i gdje je problem. Međutim, nije tada bilo kao što je sada pokvarenost u tom fudbalu. Malo sam pratio i slobodno ću reći za ovom govornicom da su Brijesnicu otprilike izbacile sudije, to mešetanje i plaćanje sudija. Dok se ne riješi situacija, mislim da će takva situacija biti i sa Doboj Istokom i sa mnogim drugim klubovima. Ne odlučuje se o tome ni u Brijesnici ni u Klokotnici nego se odlučuje u nekim tamo centrima moći koji kaže jednostavno ovo ćemo provaliti, ako ne daš 2000 ili ako ne daš 3000. Ja to otvoreno pričam i neka čuje ko hoće, dokazat ću, jer sam bio svjedok tome. Zato nema djece, zato nema svega, jer se vidi da je sve postalo plaćanje. Nije to bio problem kada sam ja bio predsjednik kluba i bilo je sa strane ljudi i iz Doboja i od svake je dolazilo, međutim sada je to poprimilo neki mah. Činjenica je da moram reći da nisu u Brijesnici finansijski problemi, jer ja sam neki dan pričao sa predsjednikom kluba koliko potroši za sezonu. Kada sam vidio koliko općina da, a vidio sam i izvršenje budžeta i 2000 mimo toga još je dobio, on može poklopiti tu sezonu. Nema tu dileme nikakve. Zašto je potrošeno? Tražit ćemo to. Međutim nije vrijeme da se traže takve analize, sada treba raditi da klub opstane i iz tih razloga ne volim prazne priče i zamolio bih Sportski savez da se uključi, jer šteta je ako se ugasi klub. Neće to moći Brijesničani sami, pa da sjedu malo sa upravom, da upriliče sastanak, da vide gdje su problemi i šta to treba pogurati otprilike. Ovdje su ambicije nekih ljudi, znate. Teško je sada naći čovjeka da vodi klub i to je tačno i ja čestitam svakome ko se uključi u vođenje nekog kluba. Međutim, kada čovjek ima neke bolesne ambicije da hoće da bude predsjednik i hoće da bude ovako, iako to nije slučaj u Brijesnici, vjerovatno, pa dođe do sukoba nekih želja i mogućnosti i onda nastaju problemi, otprilike. Sve ovo što sam rekao, rekao sam u prilog ozbiljnosti situacije i zamolio bih Sportski savez koji radi zaista izvanredno, jer mislim da je njegova zasluga što su u budžetu ovakve pare, što to redovno ide,*

*što dodatno ima para i što ih je uvijek bilo i do sada. Daje se injekcija sportu i vjerovatno i vi ovdje u Vijeću i izvršnoj vlasti znate da je važnost sporta otprilike i ta društvena nadgradnja i da je posve važna za društvo i uvijek smo se tako i ponašali, a ponašamo se i dan danas. Iz tih razloga moj jedini prijedlog ovdje je da Sportski savez, koji ima ingerencije iako je to udruženje građana, sjede sa upravnom Mladosti i da vidi gdje su problemi i mogu li im pomoći, ako ne mogu da se pokuša naći neka stečajna uprava i da se ovo provede otprilike do kraja. Moram reći da me zabrinjava sam sistem, a znam da je gospodin dopredsjedavajući u tom sistemu i da je dosta upućen u to. Ovo što se radi uništiti će dosta klubova ovako Nogometni savez Tuzlanskog kantona, ja to javno govorim i dosta klubova moglo bi se ne takmičiti. Rade dosta za sudije i ja gledam, jer često idem na utakmice i gledam u Gračanici i gledam ovdje i ne znam kako norme istrči, u njemu je 110 kila, ali zna tražiti daj mi 500 KM, daj mi 1000 itd. U Brijesnici je stvarno teška situacija i dajte ko može pomoći i predsjedavajući zajedno sa Sportskim savezom, da pokušaju da sagledaju taj problem. U Brijesnici je sada čini mi se puno interesa i našlo je se bilo neko rješenje, pa se odustalo od njega, a ne znam ni ja iz kojih razloga. Našao se bio dodatni finansijer, međutim ne možeš ti iz tih razloga i zato da sjede neko neutralan, pa da razgovara sa aktuelnom upravom kluba koja ima moju nesebičnu podršku i finansijsku i ljudsku i pravnu, da vidimo gdje je problem i da ostavimo tu Mladost, da je konsolidujemo. Šteta je nešto što je u 1948. godini formirano, a smijem se usuditi reći da je najstarija institucija u ovoj našoj novoj općini Doboj Istoka, jer starije ništa nemamo osim ljudskih života koji imaju preko 72. godine. Hvala svima koji su do sada pomagali, ali evo našao sam za shodno i zaista mi je žao što nisam diskutovao na prethodnim tačkama, jer sam imao izvanredno lijepu analizu stanja u privredi u Doboj Istoku. Ovo nisam mogao trpiti, jer su u meni proradile neke emocije. Zar je baš moralo da kolektiv koji je od '48. ovdje da se dešavaju ovakve stvari raznim spletkama i silama mračnim, ne znam koje su to sile, ali ipak mislim da bi Sportski savez sa upravom kluba mogao naći izlaz iz ove situacije.“*

*Emira Karić, predsjednica kluba vijećnika SDP: „Ja sam prezadovoljna što govorimo o čak dva nogometna kluba na području naše općine. Moram priznati male općine, ali nisam zadovoljna što ovi klubovi imaju određene probleme. Takođe postavljam pitanje kao gospodin načelnik šta je sa razvojem ostalog sporta tipa košarke i rukometa na području naše općine. Ja sam sama krenula u određene aktivnosti kada je u pitanju popularizacija rukometa na području naše općine zato što smatram da imamo jako dobre uslove i preduvjete za razvoj istog. Evo sutra imam čak dva sastanka sa dva rukometna kluba sa područja gračaničke općine, ali ja sama i vremenski i energetski nisam u mogućnosti pogotovo ako primijetim da određene osobe ili određene frakcije okreću leđa. Kažem sama nisam u mogućnosti ni energetski ni vremenski i pozivam sve da zajednički idemo u ovaj projekat popularizacije rukometa na području naše općine. Bit će mi iskreno zadovoljstvo sarađivati sa svima. Kažem, sama sam u nekim svojim vizijama krenula koracima gdje se to zaista može i ostvariti, a ujedno čestitam svim ostalim klubovima na uspjehu.“*

*Hasan Hasančević, predsjednik kluba vijećnika SDA: „Svi ćemo mi imati svoja mišljenja po određenim stvarima, ali evo ja bih uvaženoj direktorici preporučio pošto mi imamo školu rukometa da sa tim rukovodstvom napravi neku šemu, plan i program o daljem razvoju. Ja koliko znam mi ne možemo imati tamo prvenstvene utakmice dok se tehničke stvari ne završe. I košarka spada u taj dio, pa i odbojka. Načelnik je kazao što sam ja trebao kazati, neću da se ponavljam, ali školski sport šteka. Članica Sportskog saveza na indirektan način je i školski sport i ima jedan predstavnik školskog sporta u Sportskom savezu. Da li on nekada dolazi, da li ne dolazi na sastanke manje više i da li nešto traži ili ne traži, to je manje više. Znači moramo uvažavati ono što imamo, a od nove godine imamo novu članicu Sportskog saveza Akademija šahovski klub koji je odstažirao što je trebao odstažirati u Sportskom savezu i od nove godine je punopravan član. Ovo o čemu je načelnik pričao o povećanju sredstava, mi ćemo morati na jedan način prihvatiti i njihovo sufinansiranje u određenom postotku koji sleduje početnike u Sportskom savezu, odnosno kreću sa određene procentualne stepenice. Molim vas da ne*

*duplamo sportove one koji nam ne trebaju. Ovo o čemu je kolega Mehinović govorio da nemamo averzija jedni prema drugima u istim sportovima kao onaj je malo bolji, a onaj je malo lošiji. To nam je problem i to nas vraća na neku početnu stepenicu. Za mene je najbolji predsjednik nogometnog kluba u Klokotnici trenutno Izet Hodžić, a Amir Hrnjičić u Velikoj Brijesnici. Ja ne vidim bolje, jer hoće da rade to o čemu mi pričamo. Sada sa koliko ćemo snage svi uprijeti da pomognemo jednom, drugom, trećem, četvrtom, desetom i za novu godinu, ako Bog da, jedanaestom predsjedniku kluba to je do nas. Ima klubova mirno završavaju svoje sredine nemaju turbulencija, ali nemaju ni puno ljudi u upravama. Znači nema pametovanja, nema soliranja. U nedjelju umjesto da se svi pojavimo na stadionu Luke u Klokotnici, pa da nas bude 500 x 3 KM = 1500 KM i odmah je finansijski problem za jedan mjesec možda riješen. Da navijamo svako za onog za koga misli da treba, razidemo se za sat i po i idemo kućama, ispraznili se i u ponedjeljak na posao. Nažalost toga nema i onda idemo i na sudije itd. Dakle htio sam da kažem da imamo proširenje Sportskog saveza, a za ovo o čemu je Emira pričala ok je sport rukomet samo nemoj da duplamo klubove i da dovodimo sa strane koje već imamo. Da li neko hoće raditi ili neće to je njegov problem. Znači, ja se stavljam na raspolaganje Nogometnom klubu Mladost Brijesnica, odnosno cijeloj lokalnoj sportskoj zajednici 24 sata. Tražit ću, uvaženi kolega Mehmede, da napravimo sastanak te vrste s tim da bih ja pozvao i načelnika i čitavo rukovodstvo Vijeća da vidimo u čemu je problem, pa ako ljudi kažu da možemo pomoći ja sam tu.“*

*Izet Hodžić, zamjenik predsjedavajućeg Općinskog vijeća: „ Nisam mislio, ali evo na diskusiju kolege Mehinovića osjećam se djelimično prozvanim. Dio sistema ako posmatramo u kontekstu kao predsjednika kluba, ja sam predsjednik kluba i obnašam poziciju, odnosno skupštinski sam zastupnik u Nogometnom savezu Tuzlanskog kantona, ako je to dio sistema. Kategorički sam protiv ovoga što se dešava u sportu u fudbalu – nogometu, pogotovo fudbalu – nogometu na području, načelnik je rekao i mi možemo svjedočiti, cijelog svijeta pod okriljem FIFE, UEFA, nogometnog saveza državnog i svega ostalog. Ne želim ja sebe da pravdam, ali hoću da dam obrazloženje. Stvari koje se dešavaju da li su one sada u nekom procentu malo više, znači pričamo o ova dva kluba, pričamo o grani sporta koja se zove nogomet, izražene i da li su više izražene na mom klubu, pa me više boli sada u ovom momentu, nego što je to bilo u prethodnim godinama, ja to apsolutno ne želim da procijenim i da pričam. Ja jesam u prethodnom mandatu bio član izvršnog odbora, znači izvršno tijelo Nogometnog saveza Tuzlanskog kantona i iste stvari su se dešavale i u tom mandatu i u mandatu prije mene i u mandatima dosta prije mene. Ja nikada neću podržavati i truditi ću se i kao predsjednik kluba da se takve stvari ne dešavaju. Tu smo i jedan i drugi klub i vjerujte ne podržavamo takve stvari, nismo pristalice takvih dešavanja i ne podržavamo u onoj mjeri u kojoj bi određeni dio ili krug ljudi htio da bude tako. Znači odgovorno tvrdim ulažemo u infrastrukturu, a infrastruktura u ovom pogledu su igrači, trenerski kadar i na tu infrastrukturu mislim, pored ove infrastrukture koja ima opšti značaj, znači uređenje igrališta, tribina, svlačionice i stvaranje ambijenta za što bolje uslove za treniranje i igranje naših igrača. Vjerujte da tu prednjačimo što se tiče našeg ranga. Nismo poželjni sagovornicima ovo o čemu je kolega Mehmed Mehinović govorio iz tih razloga, znači nismo jednostavno prihvatili način na koji oni razmišljaju i način na koji igraju. Evo govorim za svoj klub kada sam bio član izvršnog odbora u Nogometnom savezu Tuzlanskog kantona mogli smo možda biti i prvaci te lige, ali jednostavno bit ćemo tu gdje jesmo. Mi nemamo dovoljno za rasipanje, jer plaćamo i jedan i drugi klub i nismo jedini u ovom takmičenju, plaćamo cijenu, a ne da smo direktno pitani. Znači nismo pitani, ali ne prihvatamo taj način igre i komunikacije. Ko dolazi u Brijesnicu, ko dolazi u Doboj Istok, kolege koje ne prate sport, u Doboj Istoku, govorim evo u Klokotnici, može se doći i suditi po pravilima, po PS, a odeš negdje na stranu i ne može. Nažalost to je tako. Do kada će to trajati, jer nemile scene se dešavaju i evo svjedoci smo premijer lige što treba da bude primjer svima nama i krovnog saveza i dešavanja nemilih scena i ugrožavanje ljudskih života iz kola u kolo u ovim kantonalnim ligama, da vam ne pričam, jer ko nije baš dobro involviran u sve to ne može... Najviše sam se javio na primjedbu da sam dio sistema, jesam dio sistema zato što je Općinski nogometni savez mene izabrao kao predstavnika*

*Općinskog nogometnog saveza u tijelo koje se zove Skupština Kantonalnog saveza i ako se to smatra sistemom, ja sam u sistemu. Znači zastupam interese fudbala – nogometa općine Doboj Istok u kapacitetima za koje ja smatram da mogu i dajem svoj maksimalan doprinos. Ako treba elaborirat, ja ću i elaborirat i bez imalo skromnosti ja ću iznijeti argumentovano sve šta je i kako“.*

*Emira Karić, predsjednica kluba vijećnika SDP: „ Trebalo je ovo sve proteći mirno bar na ovoj sjednici, ali eto od toga nema ništa. U ovoj diskusiji kolege Hasana sam odmah vidjela okretanje leđa, jer sam to što jesam. Takvu poruku ste poslali. Što se tiče tehničkih uslova ne morate se brinuti ja sam stalno na telefonskoj liniji sa određenima i zaduženima. Što se tiče dupliranja možda je potrebno neke stvari informisati više. Naravno nisam za dupliranje niti izbijanja nekih lokalnih rukometnih klubova i veoma dobro znam da ovdje postoji ženski rukometni klub INDEX i ako Bog da favorizujem ga i nadalje i ostali da ga favorizuju. Ovdje se radi o saradnji sa muškim rukometnim klubom iz Gračanice kako bi se popularizirao muški rukometni klub na području naše općine. Opet kažem toliko imamo uslova da možemo završiti i u premijer ligi, a da općina nema toliko nekih odvajanja što se tiče finansija. Imam tu viziju u glavi, jer smatram ako je ona dvorana onoliko napravljena i onoliko uloženo u nju da jednostavno mora taj svoj kapacitet i iskoristiti. Da li to bio rukomet, da li to bila košarka ili odbojka to će se vidjeti u narednom periodu. Po mom mišljenju do sada se nije razmišljalo na toj liniji da je zaista ona sportska dvorana, kako ste i rekli i nije imala određene pravne stvari, ali ja dobivam tzv. zeleno svjetlo da će to jako brzo biti riješeno i da unaprijed razmišljam o potpunosti tog kapaciteta dvorane.“*

*Mehmed Mehinović, vijećnik SBiH: „Ja sam se javio za riječ ponukan Kemalovom diskusijom i dok sam diskutovao dobio sam poziv za skupštinu NK Mladosti. Znači poduzete su aktivnosti i naći će Brijesnica snage da izađe iz te situacije. Evo skupština se zakazuje zbog novonastale situacije sutra u 18 sati i nastojat ću ovako bolestan da odem i dam doprinos da pokušamo izaći. Hvala ti Hasane što si se ponudio da sa Sportskim savezom pomogneš i pokušat ćemo da to riješimo sutra da to bude otprilike kako treba i da sačuvamo klub.“*

*Hasan Hasančević, predsjednik kluba vijećnika SDA: „Ja do sada nisam imao ni sa kim nespornosti što se tiče sportskih kolektiva. Kada prvi puta budete tražili od mene bilo šta kao predsjednika Sportskog saveza dobit ćete. Ko kome okreće leđa vi ste pokazali za vrijeme održavanja međunarodne rukometne utakmice gdje sam ja bio ponosan kao stanovnik općine Doboj Istok, kao predsjednik Sportskog saveza i da mene predsjednik Sportskog saveza iz Doboja zove da me pita hoćemo li na utakmicu o kojoj ja nemam pojma. Dakle, to je okretanje leđa. Ja to halalim, nije problem, jer svi traže svoj prostor pod plavim nebom i to je meni ok i to je sasvim normalno. Sasvim normalno je i ne pozvati predsjednika Sportskog saveza na bilo koju sportsku manifestaciju koju organizuje. Ja ne znam samo da je to samo ženski rukometni klub, jer su oni imali i mušku selekciju. Da li su je ugasili, da li nisu o tom potom. Ali evo kada budete prvi puta nešto tražili od mene kao predsjednika Sportskog saveza, a ja budem odbio, onda će to biti okretanje leđa. Do tada mislim da nije korektno da tako govorite. Ni sa kim nisam imao problem, osim sa ovom akademijom šampiona, ali to je bilo u razilaženju nekih misli, nekih stvari, jer oni trebaju da odstažiraju, a nisu znali itd.“*

*Kemal Bratić, općinski načelnik: „ Drago mi je da sam dobro procijenio za Mladost da ide u dobrom pravcu. Znači odgovorno sam tvrdio da Velika i Mala Brijesnica imaju snage da to iznesu. Nije mi krivo što nisam znao kada je ta rukometna utakmica, jer svako od nas radi ono što misli da treba da radi i preuzima odgovornost određenu zato što radi. Ne znam kako da kažem da me neko krivo ne shvati. Najgore je ako su dvorane prazne, ali isto tako nije dobro ako smo mi svojim snagama i oni prije nas svojim trudom i zalaganjem napravili određenu dvoranu i da je mi damo nekome na korištenje. Ja znam da je i možda ja griješim, uvažena vijećnice, da su u prethodnom periodu rukometni klubovi dolazili i trenirali u toj našoj dvorani, pa ostane od*

*ljepila i lopti, pa se poslije ne može očistiti. Nisam za to i nikada neću biti za to. Ako smo mi ulagali i trud i sredstva i vrijeme i živce u nešto da napravimo, dajte da to koriste naši građani i naši klubovi. Ja sam za to bez obzira da li ti klubovi sa strane plaćali ili ne plaćali. To mene ne interesuje. Nikakva materijalna dobit me ne interesuje. Šta je zadatak svih nas? Zadatak svih nas je da obezbijedimo uslove i mi idemo u jednom dobrom pravcu. Evo dio ćemo radova ove godine uraditi na sportskoj dvorani u Maloj Brijesnici i nijet je da započnemo jednu dvoranu u Stanić Rijeci da imamo i tamo prilike i uslove upravo o ovome o čemu sam govorio. Po meni je ključni problem ova koordinacija profesora i nastavnika tjelesnog odgoja sa našim sportskim radnicima. Ne treba da neko vodi neku sekciju samo da bi tamo popunio dnevnik onim vannastavnim aktivnostima nego treba da je vodi onako kako mi ovdje pričamo. Znači da nam proizvode talente, da ga usmjeri i da ga da u mašinu za dalji rad u nekom klubu u zavisnosti kako je dijete nadareno. Nisam želio ovom svojom diskusijom da izazovem replike, jer govorim svoje mišljenje. Sportske dvorane i terene trebaju isključivo da koriste naši građani i naši klubovi. Nije dobro ako nam se sportske dvorane i sportski tereni svedu samo na rekreaciju. Znači svi se mi trebamo zapitati da li smo dali dovoljno od sebe da neki klub zaživi ili preživi ili da se oformi u onom pravom smislu. Ponavljam ako je to samo za one rekreativne aktivnosti gdje se ljudi sastanu od 110 kila pa igraju fudbala ili nečega drugog onda to nije dobro. U svakom slučaju svaki sportski klub evo ja i kao čovjek i kao trenutni načelnik podržavam i podržavat ću onoliko koliko je to u mojoj moći i u mojoj nadležnosti.“*

*Emira Karić, predsjednica kluba vijećnika SDP: „ Ja ću se pokušati izviniti, ali se nadam da ćete i shvatiti određene razloge što se tiče međunarodne utakmice. Skratila mi je, mogu reći, tri četiri godine života. Definitivno vrijeme sam saznala noć prije. Izvinite, niste mi bili i na umu zaista. Sva organizacija se svela u 10 do 12 sati i smatrala sam da jedino mogu plasirati putem fejbuk stranice i da će to biti hajmo reći dovoljno obzirom da se radi o međunarodnoj utakmici. Čak šta više bilo je određenih propusta pošto sam sama sa suprugom i još nekim ljudima bila u tome. Ako želite prihvatite moje izvinjenje. Znači držali su me na toplo hladnom režimu onda samo naveče javili i čak zahtijevali što šta i meni to nije jasno. Ja ću itekako biti pripremljenija, ako Bog da, naredne godine. Bio je jedan propust što se tiče ljekara, uopšte ga se nisam sjetila, da se razumijemo, ali sve ostale stvari su bile ispoštovane. Ona dvorana nije imala uvjete za međunarodnu utakmicu, jer međunarodna utakmica je sadržavala ne znam, ali hajmo reći u jutarnjim satima se završavala sanitarija u određenim svlačionicama. Ljudi hoće uslove. Sekretar može da potvrdi da morate naći i vrijeme, a morate naći i novac i sve ostalo da uradite nešto za moj pojam dobro za našu općinu. Ja smatram da je bilo i određenog bojkota nedolaska možda zbog toga zato što nisu išle pozivnice. Ja sam voljela da sam imala mogućnosti da pošaljem pozivnice ne samo načelniku i Sportskom savezu već i ostalima, kao i vama kolege vijećnici, ali sam bila u cajt notu, što se kaže i za 10 sati sam morala ispoštovati pravila jedne međunarodne utakmice. Što se tiče svega onog što je načelnik govorio da li je popularno, da li je dobro davati nekima termine, vjerujte mi ja sam jako zadovoljna sa članovima školskog odbora, a vi to sada smatrajte kako želite. Možete pročitati zadnji zapisnik od preksinoć gdje smo zaista raspravljali o tim stvarima do sitnih detalja gdje smo rekli da se u najvećoj mjeri meni stavlja na teret ukoliko neke stvari ne predvidim. Zato smo odlučili da sklapamo ugovore na jednu školsku godinu, a ne do nemila da bi upravo vidjeli da li neko šteti našoj dvorani, da li joj koristi itd. Tako da se ne trebate brinuti ja sa članovima školskog odbora imam dobru misiju i dobru viziju, razmatramo i štete i koristi i tako ćemo raditi i u buduće.“*

*Kemal Bratić, općinski načelnik: „ Ja zbilja ne znam kome se izvinjavate. Vi niste dužni da se izvinjavate i ja sam jasno rekao svako od nas radi i pokazuje ko koga uvažava i na taj način nam daje do znanja kakav je odnos, odnosno kakav je bio i kakav će biti. Da ste poslali samo poruku to bi bio red, ne obaveza, to je red da pošaljete poruku predsjedniku mjesne zajednice u kojoj se to dešava, da pošaljete poruku predsjedavajućem Vijeća, da pošaljete poruku nekom načelniku kojeg ne uvažavate i to bi bio drugačiji par opanaka. Niko nije očekivao pozivnice i ja vam vjerujem da to bilo tako preko koljena, znajući i imajući informacije kako se sve odigralo i ne*



*zamjerim vam. I da ste mi poslali pozivnicu ja možda ne bih došao na utakmicu, jer sam bio bolestan. Ali dokle god se mi ne budemo međusobno uvažavali i poštovali onoga koga negdje izaberemo da radi nema nafake i neće biti nafake. Nije to samo ovdje kod nas nego je to generalno problem svugdje. Ja želim uspješan rad školi bez obzira što vi dolazite iz druge političke opcije. Želim vama prije svega uspješan rad, jer znam da nije lahko, znam kroz šta prolazite i znam kroz šta ste prolazili u zadnja dva mjeseca. Nije lahko voditi džematski odbor, a kamoli jednu takvu obrazovnu ustanovu i vi trebate voditi računa, jer ste dužni. To je naša imovina i neko je tu uložio puno truda i znoja i prije nas i poslije nas će ulagati i vi to trebate čuvati, jer ste kao direktor odgovorni za to. Ja nisam, nego vi. Vi ćete sutra odgovarati svima nama koji smo se trudili da to napravimo, jer hvala Bogu ostat će nešto iza nas da smo uradili. Isto će tako biti i sa sportskom dvoranom i ja vjerujem da će se rasteretiti i ta dvorana u Velikoj Brijesnici kada se završi ova, ako Bog da, u Maloj Brijesnici. Imamo jednu mini u Lukavici Rijeci, imamo jednu ovdje u Klokočnici, imamo na Kapku i ostaje nam još samo Stanić Rijeka i da podvučeno crtu i da stvorimo sve uslove da nam niko ne može reći da nemamo uslova da treniramo. Nemate potrebe bar mene što se tiče da se izvinjavate, kao što Hasan kaže, to je sve davno bilo i halalimo.“*

*Selmin Karić, predsjedavajući Općinskog vijeća: „Ima li još prijavljenih? Nema. Kada je već rasprava došla do ovog nivoa da i ja nešto kažem. Kada je u pitanju Mladost evo i ja se iskreno nadam da će se to tamo riješiti. Ja sam naravno uvijek bio tu na raspolaganju i u ranijem periodu, a naravno i u budućem i sve što bude trebalo stojim na raspolaganju. Kada je u pitanju ova tačka dnevnog reda, a odnosi se na uspjeh naših sportskih klubova ono što sam ja uvijek govorio u prethodnim periodima za mene uspjeh je uvijek na drugom mjestu, a na prvom mjestu je masovnost i na prvom mjestu su djeca i naša omladina da ih što više ima u tim klubovima. Nije bitno da li to fudbal, da li je to karate. Trenutno imamo oko 450 članova u svim klubovima i to je otprilike oko 5 % našeg stanovništva, pa, ako Bog da, da dostignemo cifru od 10 % i to bi bio naš uspjeh. Vjerujte to je uspjeh a sve ostalo je u drugom planu. Ima li još prijavljenih? Nema. Ko je za prihvatanje Informacije o uspjehu sportskih klubova?“*

*Glasanje: ZA – 17, PROTIV – 0, SUZDRŽANIH – 0*

### **18. Razmatranje i usvajanje Informacije o provedenim aktivnostima povodom obilježavanja Dana brigade.**

*Selmin Karić, predsjedavajući Općinskog vijeća: „Ima li prijavljenih? Nema. Ko je za usvajanje informacije?“*

*Glasanje: ZA – 17, PROTIV – 0, SUZDRŽANIH – 0*

*Zahvaljujem se i zaključujem današnju sjednicu.“*

*Sjednica je završena u 11,55 sati.*

**ZAPISNIČAR**  
Behara Hadžić

**SEKRETAR OPĆINE**  
Omer Hadžić

**PREDSJEDAVAJUĆI**  
**OPĆINSKOG VIJEĆA**  
Selmin Karić

*Službena zabilješka:*

*Zapisnik je usvojen na 10. redovnoj sjednici Općinskog vijeća Doboj Istok održanoj dana 28.10.2021. godine.*

*U Klokočnici, dana 29.10.2021. godine*

*Zabilješku sačinio*  
*Omer Hadžić, sekretar Općine*